

Naqqiut
Akissuteqaat 31. oktober 2019-imeersoq taarserpaa

Uunga siunnersuut: Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat nr. xx, xx. xxx 2019-imeersoq

Akissuteqaat

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Aappassaaneerera

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq inatsisissatut siunnersuutip suliarineranut atatillugu pimoorullugu suliaqarsimaneranut qutsavigissavara.

Ataatsimiititaliap akerliusoqarani siunnersuummik tapersersuinera Naalakkersuisut nuannaarutigalugu malugaat.

Inatsisissatut siunnersuut namminersortutut suliffeqarfinnut ingerlatsinertik isertitaqarnertillu aqutigalugit isumaginninnermi siunertanik siuarsaanissamik siunertaqarlutik inuussutissarsiornermik ingerlataqartunut ataatsimoorfigisatut kinaassusersitsivoq. Inatsisissatut siunnersuutikkut innuttaasunik tapersersortarialinnik suliffissaqartitsisutut suliffeqarfinnut ussasaarineranut tunngatillugu naleqassutsimik nassataqartitsisinnaasumik tutsuiginassutsimik Naalakkersuisut tunniussa qarussupput.

Suliassaqarfivoq nutaaq maannakkut inatsisilersugaalersoq. Nalunaarsuinermik aaqqiissutip isumaliutigisatut iluaqutissanik nassataqartitsinerata takusinnaalernerana sioqqullugu pisortat namminersortutullu suliassanik neqerooruteqartartut nalunaarsuisarnermik aaqqiissummut naammattumik ilisimasaqalernissaat piunasaqaataavoq.

Inatsisissatut siunnersuummi aamma isumaliutissiissummi qitiusutut ilaasuni inatsisip paasinissaanut pingaarutilittut ilaliussat ataatsimiititaliap isumaliutissiissutaani suliarineqarput. Taamaattumik malittarisassiat piviusumik atuutsilernissaannut isumaliutissiissut sakkussatsialaavoq.

Siunnersuutip aappassaaneeraneranut § 6, imm. 2-mi pineqartutut atuutsitsinnginnermik, tamatumunngalu tunngaviusumik annertunerusumik Naalakkersuisut erseqqissaanissaat pillugu ataatsimiititaliaq isumaliutissiissummini qinnuiginnippoq.

Suliffeqarfik nammineq CVR-normuuteqartoq, aammalu Kalaallit Nunaanni angerlarsimaffeqartoq Inatsisartut inatsisaat malillugu innuttaasunik tapersersortarialinnik

suliffissaqartitsisut suliffeqarfittut nalunaarsorneqarsinnaanera inatsisissatut siunnersuummi allassimavoq.

Taamaattorli suliffeqarfiit piginneqatigiilluni pilersinneqarsimasut, aamma inummit ataatsimit ingerlatarineqartut suliffeqarfiusut aaqqiissutaasoq malillugu nalunaarsorneqarsinnaanngitsut inatsisissatut siunnersuummi § 6, imm. 2-mi malitsigisaavoq. Tamatumunnga tunngavigisaq tassaavoq piginittup aamma suliffeqarfiup aningaasaatigisaasa akornanni immikkoortitsisoqannginnera. Taamaattumik suliffeqarfimmik piginnittut nammineq aningaasaatigisaanit naatsorsuutaaniillu immikkoortillugit suliffeqarfiup aningaasaqarnera naatsorsuuteqarneralu nalunaarsorneqarsinnaanngillat. Soqutigisaqatigiiffik killeqanngitsumik aamma suliffeqarfiup pisussaaffigisaanik assigiimmik pisussaaffeqarfialugit, ilaasortat peqataasut aningaasaataannit naatsorsuutaannillu suliffeqarfiup aningaasaataasa naatsorsuutaasalu immikkoortillugit nalunaarsorneqarsinnaaneri apeqqutaatinnagit ilaasortatut peqataasut inuttut akisussaaffigivaat.

Taamatut oqaaseqarlunga Naalakkersuisut sinnerlugit taamatut iluseqartillugu inaarutaasumik akuerisassanngorlugu siunnersuutip saqqummiunneqartup pingajussaaneernissaa innersuutigissavara.